

Royal Greenland suleqatigalugu saarullinnik uumatitsivinnik amerlanerusunik pilersitsisoqarnissaanik pilersaarusiortoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Siverth K. Heilmann, Atassut)

Akissuteqaat

(Aalisarnermut Piniarnermullu Naalakkersuisoq)

Inatsisartunut Ilaasortaq Siverth K. Heilmann, Atassut, Royal Greenland suleqatigalugu saarullinnik uumatitsivinnik amerlanerusunik pilersitsisoqarnissaanik pilersaarusiortoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuummik saqqummiussaqaarmat Naalakkersuisut qujapput.

Aalisarnermut Piniarnermullu Naalakkersuisutut Royal Greenland aamma aalisarnermut attuumassutillit ingerlaavartumik oqaloqatigisarpakka. Apeqquteqaat aallaavigalugu isummernissamut siunnersuummut tassunga apeqqutit attuumassuteqartut aalisakkanut uumatitsiviit pillugit ingerlatsinermut atugassarititaasunullu tunngassuteqarmata tamanna pillugu Royal Greenlandimut tusarniaasimavunga. Taamaattumik Naalakkersuisut akissuteqaataat Royal Greenlandip tamanna pillugu paasissutissiinerinit tunngaveqassaaq.

Suliniut Nutaaq pillugu suliniummi aalisartut peqataasut amerlanersaasa suliniut naammagisimaaraat, Royal Greenlandip ilisimatitsissutigaa. Aalisartut erseqqissarpaat, angallatinut anginerusunut allatut ajornartumik aningaasaliisariaqannginneq pitsaasuusooq, illuatungaanulli umiatsiaaqqanik allannik suleqateqarsinnaanermut periarfissaqarluni. Aalisartut aamma erseqqissaatigaat, aalisarnerup nukersornannginnerunera pitsaasuusooq.

Angallat aalisakkanik uumasunik assartuut namminermini akimmisaartitsisuunngilaq. Maniitsumi suliffissuup piginnaasaata pitsaanerulersinnissaa Royal Greenlandip sulissutigaa. Teknikkikkut aaqqiissuteqartoqarpoq, ulapaarfiunerpaallu nalaani suleqatigiit marluk paarlakaallutik sulisarput ilaatigut tamanna pisinnaanngorsimavoq avataaneersunik sulisoqarnikkut.

2024-mi januar-marts Qeqertarsuatsiaani, Nuummi, Maniitsumi Sisimiunilu aalisartunik Royal Greenland ataatsimeeqateqarpoq, Atammimmi piffissami aggersumi ataatsimiinnissaq pilersaarusiortarpaat. Ataatsimiinnerni Royal Greenland aalisartullu misilittakkanik paarlaasseqatigiittarput aamma Suliniut Nutaaq pillugu suliniummut pitsanngoriaataasinnaasut qimerloorneqartarput. Royal Greenland aamma aalisartut suleqatigiillutik ilaatigut naliliipput aalisartuni aamma nioqqutissiortut aalisartullu akornanni misilittakkanik paarlaasseqatigiinnermut pitsaasumik attaveqatigiinneq aalajangiisuusooq, attaveqatigiinneq sumiiffinni ataatsimiikulaarnikkut kiisalu facebookimi allagarsiinikkut pitsaanerulersinneqarsinnaasooq, saarulliit bundgarninik pisat ullut 14-t ingerlareernerata kingorna iisaarutereerpata pisat tunineqartuaannarsinnaasut, aammalu uumatitsivinnik agguataarineq qeqqaniit aqunneqassaaq piginnaasaq sapinngisamik pitsaanerpaamik atorniarlugu.

Aalisakkat toqangasut pillugit siusinnerusukkut paasissutissiisoqartarsimavoq, kisianni toqqaannartumik KANUAANA-mut saaffiginnittoqanngilaq imaluunniit taakkunangga

nalunaarsuisoqannigilaq. Saarulliit toqungasut amerlassusaannik nalunaarsuineq uppersarniarlugu uumasut avalatseqqinneqartut kiisalu bundgarninik imaluunniit uumatitsivinni saarulliit toqusut amerlassusaat nalunaarsorlugit uppersarneqarnissaat 2024-mi piffissaq ilanngullugu KANUAANA-p kissaatigisimavaa.

Suliniummot Nutaamut atatillugu aalisakkanik uumatitsiviit atornerarnerat 2016-miit aalisartut 50-t missaannit 2023-mi aalisartut 120-t missaannut amerlassuseqalersimapput. 2024-mi uumatitsiviit amerlassusaasa qaffaqqinnissaat naatsorsuutigineqarpoq. Tamatuma saniatigut ingerlatsisumit Royal Greenlandip saarullinnut uumatitsiviit ingerlataasa assinginik aallartitserusulluni kissaateqartumit 2023-mi saaffiginissummik Aalisarnermut Piniarnermullu Naalakkersuisoqarfik tigusaqarsimavoq.

Aalisarnermik inuussutissarsiuteqarnerup pitsaasumik ineriartornissamut periarfissaqarnissaanut qulakkeerinnittussat aalisarnermut tunngavissat aalajangersarnissaat Naalakkersuisut suliassaraat. Kisianni ingerlatseqatigiiffiit niuernikkut ingerlatsinerata ineriartornissaanut pilersaarusiorneq Naalakkersuisut suliassarinnigilaat. Saarullinnut uumatitsivinnik atuineq annertusiartortoq pillugu inatsisiliornissaq aalisarnermut kattuffiit kissaatigigaat Aalisarnermut Piniarnermullu Naalakkersuisoqarfik paasitinneqarsimavoq.

Inuussutissarsiutigalugu aalisartut saarullinnut uumatitsivinnik atuisut amerlassusaasa ineriartornerat, tunisinerup taamatut ilusillip ineriartorteqqinnissaanut soqutiginninnerujartorneq taassumalu aaqqiiffigineqarnissaanik kissaateqarneq tunngavigalugu, allannguutissat siunnersuummik tunniussissaanga. Neriuppunga allannguutissat siunnersuut taanna ammasumik soqutiginnittumillu tigujumaarissi, allannguummot siunnersuummi tassani sinaakkutit siammasinnerusut pilersissavagut, saarullinnut uumatitsivinnik atuinerup ingerlatsisunut amerlanerusunut ammaassimmat.

Qulaani oqaatigineqartut tunngavigalugit inassutigineqarpoq, allannguutissat siunnersuut imaattoq siunnersuutigineqassasoq:

Saarullinnut uumatitsiviit atornerinut tunngavissat iluarsiiiffigineqarnerata nalunaarutinut attuumassuteqartunut ilannguteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Taamatut oqaaseqarlunga aalajangiinissamut siunnersuut Aalisarnermut Piniarnermut Nunalerinermullu ataatsimiititaliamut ingerlateqqinneqassasoq Naalakkersuisut sinnerlugit inassutigaaara.